

LA  
**RESPONSE**  
 DE LA RALLIERE  
 A L'ADIEV DE CATELAN.  
 SON ASSOCIE.

OV  
 L'ABREGE' DE LA VIE DE CES  
*deux infames Ministres, & Auteurs des*  
*principaux brigandages, volleries,*  
*& extorsions de la France.*



A PARIS,  
 Chez ROLIN DE LA HAYE, rue d'Escoffe,  
 près le Puits Certain.

M. DC. XLIX.  
 AVEC PERMISSION.





LA RESPONSE DE LA RALLIERE,  
à l'adieu de Catelan son associé.

CASE  
F

39

326 Ou l'Abregé de la vie de ces deux Infames Ministres, &  
Autheurs des principaux Brigandages, Volleries,  
1649 Lr & Extorsions de la France.



ONSIEVR,

Puis que vous m'avez traité de la sorte, encore que ce soit vne qualité que nous ne meritions pas, vous m'excuserez si ie n'y adiouste celle de confrere: Car depuis ma detension, ie vous puis asseurer que ie suis tellement changé, & sur tout depuis que j'ay leu le Catechisme qu'on nous a dressé, que ie suis tout resolu à faire restitution, & reformer ma vie, si Dieu me fait la grace de sortir de prison, non pas pour aller à la Greue, où vous dites que nous nous pourrions voir. Mais si vous m'en croyez, nous racherons d'éviter cette rencontre, & profiter de la doctrine & des auis que ie vous enuoye. Vous sçavez que la Bastille sert aux meschâns plus que toutes les remonstrances du monde, que les vicieux y deuiennent vertueux, & que des ignorans comme nous, y apprennent assez pour faire leur salut.

Je croy que Dieu, que ie n'auois point connu iusques à present, a permis que ie sois detenu dans ce lieu, pour apprendre à le connoistre, & pour faire de ma conuersion vn miracle si extraordinaire, qui fera mourir plus de Partisans, que l'espée du Parlement, ny que toutes celles qu'il veut employer contre nous. Prenez donc en bonne part ce que ie vous vay dire, sans vous imaginer que la necessité me fasse parler ainsi. Je ne suis pas moins touché que vous de nostre disgrâce, & estant comme ie suis le meilleur de vos amis, ie voudrois pour vostre interest que vous fussiez icy avec moy, afin que vous prissiez d'autres sentimens, & que vous fussiez à couuert des maux qu'on nous prepare. Je voy desia nostre perte asseurée, & ne doutez pas qu'aucun nous vueille pardonner, vous qui n'espargnates iamais personne. Pour moy, j'espere encore en la bonté de mes Iuges, & peut estre que mon repentir desarmera le



pronostique tousiours de grandes reuolutions : & qui doute que l'vniou du Parlement & de Paris ne produise d'heureux changemens dans tout ce grand Royaume. Ce n'est pas vne chose nouuelle, que des Gens tels que nous soient chassiez auiourd'huy pour auoir opprimé l'innocence, fait triompher la malice, & banny les vertus du commerce des hommes.

La mort violente est vne punition trop douce, en comparaison de nos crimes. Le peché qui nous suit tousiours, est le bourreau qui nous fait souffrir tous les iours mille morts pour vne. Nostre ame est vn enfer, où les tourmens ne laissent pas d'estre cruels, encore qu'ils soient inuisibles. En effect les Partisans peuuent tromper les yeux des hommes, qui ne iugent que de ce qui leur paroist. Dans la tristesse, nous pouuons contrefaire vn visage content : Dans l'inquietude, vne grande tranquillité, & dans le desespoir, vne satisfaction parfaite. Mais c'est vne importune & facheuse comédie, que nous sommes contrains de iouer à toute heure. Car comme ceux qui representent sur le theatre quelque personnage, ne sentent pas les passions qu'ils tesmoignent aux spectateurs, & que cette feinte leur est bien souuent penible : ainsi ils n'ont garde de goûster tous les delices, dont ils veulent faire croire qu'ils iouissent par leur contenance trompeuse.

Dans vne pareille contrainte, nous souffrons vne gesne insupportable. Si la nuit ferme nos yeux, ce n'est que pour nous enuoyer des songes espouuentables, nous ne voyons rien qui ne nous reproche nos crimes, & qui ne réuele à nostre auis, ce que nous commettons dans nos cabinets. De iour nos consciences nous pressent de mille remords : Nos visages changent de couleur à tous momens, nos yeux se troublent, & come nous ne conceuons dans nos cœurs que des impiétéz, il ne sort de nos bouches que des blasphemés, mais nous sommes au desespoir, lors que nos iniustes desseins ne réussissent pas selon nos infames desirs, & à peine en ces rencontres nous pouuons nous souffrir nous mesmes : tout nous fait peur, & rien ne nous peut asseurer. Nos domestiques mesmes nous épouuantent, & nous craignons l'abord de qui que ce soit qui nous visite. Quand nous nous mettons à table pour manger, nous nous figurons que toutes les viandes qu'on nous sert sont empoisonnées, & que nous trouuerons la mort où nous cherchons la conseruation de la vie.

Il ne faut point chercher d'où viennent ces terreurs qui nous épouuantent, & ces chaisnes inuisibles qui nous ostent la liberté.



Nous devons croire que ce sont nos perfidies, nos luxes & nos avarices qui en sont les veritables causes, & que Dieu veut que les maux que nous faisons souffrir aux autres, donnent sans cesse la torture à nos esprits. Au contraire les gens de bien n'ont que des pensées & des songes agreables : Il n'y a point de bonnace plus profonde que celle de leurs esprits : Ils ne craignent personne, parce qu'ils n'ont iamais donné suiet de se plaindre d'eux avec raison : ils parlent hardiment, parce qu'on ne leur peut faire des reproches : La ioye de leurs visages tesmoigne celle de leurs ames, & leurs langues seruent tousiours à leurs cœurs de fidelles Interpretes.

Vous me direz sans doute que ie fais le Predicateur, & que ie n'eus iamais de si bons mouuemens. Il est vray, ie vous l'accorde : mais ayez telle opinion que vous voudrez de mes sentimens, ie suis resolu de viure selon les loix du veritable Euāgile, parce que vous & moy n'auons iamais ouy parler que du faux. Je sçay que vostre cœur est tellement endurcy, qu'il faut pour le toucher plus d'un miracle, autrement vous n'y croirez iamais. Je sçay que nous auōs vescu iusque icy sans foy, sans Religion, & sans loy; mais il est tēps que nous commencions vne meilleure vie, & que nous rendions graces à celuy, qui par sa misericorde nous fait ouurir les yeux pour l'adorer, il ne veut point nostre mort, & malgré toutes les resistances que nous luy faisons, il nous veut attirer à luy. Mais il semble que vous vous offensiez de ces remonstrances Chrestiennes & morales, & que l'image de vostre vie passée, soit plus capable de vous ramener, que tous les passages de la Bible. Peut estre que quand on vous parlera de vostre neant, & de la bassesse de vostre naissance, vous aurez honte de la vie que vous faites maintenant.

Escoutez donc ce que j'appris quant hier par vn de vos Commis qui me rendit visite : ietairay par respect les noms de la Prouince & de la ville où vous estes né, craignant de ternir en quelque façon par vostre infamie, la memoire & la reputation des grands Hommes qu'elles ont porté. L'offencerois cette genereuse Noblesse en luy parlant de vous, elle qui a tousiours esté comme elle est encore auioird'huy le principal instrument de la gloire de nos Princes, & vous celuy de la misere de leurs Peuples. Voicy ce qu'il me dit, que vostre naissance estoit fort obscure, & que la maison de vostre pere estoit vne Academie de berlant & d'amour, où vous ne seruiez qu'à moucher la chandelle, faire du feu, servir à table, & porter les poulers, j'entens ceux de Venus, & lors que ces pratiques venoient à manquer, vous estiez contraint de porter les



iours de marché vne boîte pendue à vostre col, dans laquelle il y auoit pour toute marchandise, pour six blancs d'esguillettes de peau, que vous vendiez aux payfans pour auoir de quoy viure: quelques-fois vous aliez à la chasse des petits oiseaux, que vous preniez à la pipée, les donnant pour vn morceau de pain aux enfans de vostre âge.

Du depuis, vostre industrie croissant avec vos forces, vous creûtes que vous estiez capable de quelques meilleurs emplois, & c'est ce qui vous fit resoudre de venir à Paris, avec vn équipage semblable à celuy de quelques Montagnards de vostre Patrie, lesquels au commencement de l'Hyuer, vont chercher és pays Estrangers, les moyens de gagner leur vie. Il me souuient d'en auoir rencontré autrefois en mes voyages, montez sur des cheuaux de S. François, portans sur leurs espauls des sacs de laboureur, remplis de vieux haillons. Je ne diray rien des auantures de vostre route, vn chacun se les peut imaginer. Enfin vous arriuastes en cette bonne Ville, l'asile des miserables, & vostre bonne fortune vous menant par la main, vous logea pres d'une maistresse de Cornuel, laquelle vous ayant ouy degoiser quelque air au son d'un violõ, elle vous a voulu auoir, vous iugeant propre à la diuertir, car le plus souuent ces putains ont le goust depraué: & quãd elles sont saoules des bonnes choses, elles en demandent de mauuaises pour leur donner de l'appetit; tant y a que cette honneste Damoiselle vous recommanda à son Financier qui vous mit dans les affaires, & pour vous mieux lier à son seruice, il vous fit espouser vne de ses bastardes, laquelle vous a rendu si parfait és intrigues d'amour, que par honneur on vous nomme le Maquignon de chair humaine. Voila mon cher amy vn racourcy de vostre vie, auquel i'adiouste les reflexions que vous deuez faire sur les deux faces d'icelle, vous pardonneriez à mon zele, si ie parle si franchement. Mais quand ie deurois rompre avec vous, ie ne veux rien espargner pour vous tirer du vice.

Faites s'il vous plaist comparaison de vostre premiere vie à celle d'auourd'huy, & vous connoistrez que la méconnoissance nous perd. Remettez-vous deuant les yeux le temps auquel vous dressiez des pieges à l'innocente nature des oiseaux, pour les employer quelque iour comme vous faites contre ceux de vostre espee: Ce qui fait voir que vous estes d'un naturel, fourbe, fripon, & traître. Vous deuez prendre garde qu'il ne vous arriue comme à cet oiseau de la fable, qui n'estoit paré que des plumes des autres oiseaux, lesquels venans à fondre sur luy, ils reprirent leurs plumes, & le lais-

ferent aussi gueux qu'un rat. N'oubliez pas ce train superbe, avec lequel vous vintes à Paris, beaucoup moindre que celui que vous avez à présent, & qui sentoît plutôt le Goujart, que non pas le grand Partisan. Souvenez-vous sur tout de cet employ honorable, que vous avez exercé pendant votre vie avec tant de réputation, que vous passez pour le plus honneste vilain de France: Ne m'annoïerez-vous pas que vous n'estes parvenu que par ces voyes infames, que vous ne vous maintenez que par ce trafic des honnestes, & que les intrigues de l'amour vous ont ouvert la porte de celles des Finances, desquelles vous vous estes si bien seruy, qu'on dit que vous avez volé quatre à cinq millions de l'argent du Royaume. Il n'y a point d'estar ny de condition, qui n'ait senty les traits de votre avarice: Vous avez traité également l'Ecclesiastique & l'Officier, le Noble & le Roturier. Tout le monde a gemy sous les charges qu'on luy a imposées, prouenant de l'invention de votre esprit malin, qui se nourrit de la desolation des pauvres.

Voilà ce que j'avois à dire, pour vous obliger de quitter le vice, corriger vos mœurs, & commencer une meilleure vie. J'ay creu qu'il n'estoit pas necessaire de mettre icy un abrégé de la mienne, parce qu'elle ne differe gueres de la vostre, & que vous sçavez bien qu'il n'y a personne qui l'ignore. Tous nos Confreres se pourront voir dans cette petite esbauche, lesquels s'exhortent aussi de suivre mon exemple d'aller au deuant de la tempeste qui gronde sur nous, & que bien-tost nous reduira en poudre. Si nous ne la diuertissons par une ferme resolution de mieux viure viure à l'auenir, il faut que nous commençons par la restitution des grâdes richesses que nous possedons iniustement, il les faut rendre à l'Estat à qui nous les auons prises, il nous en restera encore assez pour viure, sous le bon plaisir de la Justice. Ne differons donc plus ce que la necessité, nostre salut, & le bien de la France exigent de nous. Adieu, quelque iour vous me remercierez de la liberté que j'ay prise de vous dire ces veritez.